

## Celebrade intal cjistiel di Udin la Fieste de Patrie dal Friûl

Comun e ARLeF a àn organizât un incuintri simbolic ae presince di diviersis autoritâts regjonâls

Chest an la Fieste de Patrie dal Friûl, rivade ae sô 44<sup>e</sup> edizion, si sarès vude di tignî a Udin cun tantis iniziativis culturâls. Pal secont an consecutîf, la emergjence de epidemie e oblee a rimandâ a Setembar lis iniziativis in program, pe ocasion di Friûl Doc.

Il Comun di Udin e la ARLeF a son in convigne su la impuartance di organizâ un incuintri curt, ma simbolic, cu la presince dal president dal Consei regjonâl, Piero Mauro Zanin; dal assessôr regjonâl aes financis, Barbara Zilli; di Markus Maurmair, president de Assemblee de Comunitât linguistiche furlane; dal sindic di Udin, Pietro Fontanini e dal president de ARLeF, Agenzie Regjonâl pe lenghe furlane, Eros Cisilino.

Lis autoritâts si son cjetadis prime sul plaçâl dal cjistiel di Udin par assisti al alcebandiere su la specule; po dopo, a son ladis tal salon dal Parlament, «un dai prins in Europe, chel dal Friûl, ancje se chescj aspjets de storie locâl a restin discognossûts a masse furlans, parcè che a scuele no son insegnâts – al à dit Cisilino –. Ce che o volarès meti in evidence al è il grant sens di identitât che al à il popul furlan. Un sintiment che chest an o vin cirût di contâ cuntun video che al à za passât un milion e 200 mil visualizacions. Dut câs, o vûl ricuardâ il valôr fundamentâl de trasmission tra lis gjeneracions, parcè che “al dipent di nô”, cemût che o vin dit intune campagne di cualchi timp indaûr. Di là des istituzions, o sin noaltris singui furlans che o vin di impegnâsi ogni dì par fâ cressi e par fâ vivi la nestre lenghe. Par chest o vin di insegnâle ai nestris fîs. I fruts e i fantats a son il nestri avignî. Al è a lôr che o vin di cjalâ”.

Chê di vuê e je stade «une cerimonie une vore contignude», al à marcât Fontanini. Il sindic al à ricuardât la impuartance di celebrâ la zornade dai 3 di Avrîl, che intal 1077 e à decretât la nassite dal Stât Patriarcjâl furlan, la istituzion che, fin al 1420, e à metût adun il Friûl e tancj altris teritoris intun unic organisim statuâl che, par chê ete, e rapresentave une forme di organizazion civîl une vore indevant. «Par nô furlans cheste date e je significative - al à precisât -. E rapresente il principi di une storie e de identitât di un popul che al à mantignût, par tancj secui, i trats distintîfs de sô identitât che a son *in primis*, la lenghe furlane - che e je ancjemò, fevelade, tutelade, insegnade e, jo o dîs, ancje amade - e dopo, la storie».

Un sintiment identitari che al passe ancje i confins dal Friûl, e che si cjate ancje intai Comuns, tant che Sapade, che a àn domandât di jentrâ a fâ part de Regjon, al à ricuardât Maurmair. Il president de Assemblee di Comunitât linguistiche furlane al à fat savê che «cun ARLeF o sin daûr a lavorâ par che dutis lis risorsis che la Regjon e met a disposizion

### INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<<

de nestre Comunitât a sedin dopradis par fâ cressi simpri di plui la coesion economiche e sociâl dai furlans».

Ancje Zanin al à marcât che «cheste lenghe e va tutelade; cheste nus unîs dentri dal Friûl, ma ancje ator pal mont, parcè che e je un veicul di identitât, di valôrs e parcè che nus fâs sintî une robe sole. Nol è Friûl cence furlan».

L'assessôr Zilli e à sierât fevelant de complessitât dal moment che o sin daûr a vivi, e e à invidât dute la popolazion «a superâ ducj insiemi chest moment dificil sot di cheste bandiere che e je fate di solidarietât, di lavôr e di impegn. Al è cun chest spirt che o vin di dâ un insegnament ai nestris fantats continuant a fevelâ furlan e, tant che istituzions publichis, o vin di sostignî la sô divulgazion, e la sô cognossince, tacant des scuelis.

Udin, ai 03 di Avrîl dal 2021

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<